

भारत अर उज़्बेकिस्तान रे बीचे न्यारा-न्यारा हलकां मांय 11 करार माथे दस्तखत करी ज्या—प्रधानमंत्री नरेन्द्र मोदी ने उज़्बेकिस्तान रो सब ऊं ऊंचों सन्मान।

प्रधानमंत्री नरेन्द्र मोदी आकाशवाणी रू “मन की बात” कार्यक्रम मांय विचार साझा करया—नशा मुक्त समाज सारू लोगां ऊं आगे आवण री अरज।

प्रदेश मांय नगरीय निकाय चुनाव सारू नामपाना भरण रो काले आखिरी दिन—राजनीतिक दलां मांय उम्मीदवार चुणण रो काम आखिरी दौर मांय।

राज्य निर्वाचन आयुक्त राजेश्वर सिंह मतदान तैयारियां रो जायज़ा लियो—निष्पक्ष अर साफगोई रे साथे चुणाव रा निर्देश दिया।

000

भारत अर उज़्बेकिस्तान आज खनन, आयुर्वेद, पर्यटन, आर्थिक अर रोकड़ संवाद, गहरी अर रणनीतिक साझेदारी, ऊंची शिक्षा अर पर्यावरण समेत ग्यारह हलकां मांय केई करार माथे दस्तखत करया। दोन्यू देश साल 2030 ताई द्विपक्षीय कारोबार ने पांच अरब डॉलर ताई पूगावण रो लगस तैय करण माथे राजी व्ह्या। प्रधानमंत्री नरेन्द्र मोदी अर उज़्बेकिस्तान रा राष्ट्रपति शफकत मिर्जियोयेव री मौजूदगी मांय ताशकंद मांय ओ एम ओ यू व्हियो। दो दिन री जातरा माथे उज़्बेकिस्तान पूग्या प्रधानमंत्री नरेन्द्र मोदी ने उज़्बेकिस्तान रा ठावा सन्मान **ओली दराजली दुस्तलिक ऑर्डर** ई नवाजी ज्यो। दोन्यू देशां रा बीचे मदद ने मजबूत करण सारू महताऊ काम अर कोशिशें सारू श्री मोदी ने ओ सन्मान मिल्यो है। ओ विदेशी नेतावां ने दिया जावण वाळां उज़्बेकिस्तान रो ठावो सन्मान है। उज़्बेक राष्ट्रपति रे साथे नुमाइंदा मण्डल थर री बतळ रे दौरान आपरा भाषण मांय प्रधानमंत्री श्री मोदी कह्यो के दोन्यू देश उन्नत साझेदारी रा ढांचा मांय ठोस लगस तैय करने आगे बधेला। श्री मोदी दोन्यू देशां रे बीचे रणनीतिक साझेदारी री 15वीं वर्षगांठ अर उज़्बेकिस्तान रा स्वतंत्रता दिवस री 35वीं सालगिरह रा संयोग माथे ई खुशी जतावता वठा रा लोगां ने बधाई अर शुभकामनावां दी।

इण ऊं पहला श्री मोदी उज़्बेकिस्तान मांय भारतीय समुदाय रे साथे बतळ करी। वां रो ताशकंद मांय भारतीय रीत अर संस्कृति रे साथे शानदार स्वागत करी ज्यो। दो देशां री जातरा रे दौरान श्री मोदी उज़्बेकिस्तान रे पछे किर्गिस गणराज्य जाएला।

000

प्रधानमंत्री नरेन्द्र मोदी कयो है के **नशा मुक्त युवा फोर विकसित भारत अभियान** आखा देश मांय तेजी ऊं आगे बध रियो है। आज आकाशवाणी ऊं मन की बात कार्यक्रम री 137वीं कड़ी मांय श्री मोदी ई बात माथे खुशी जताई के नशा मुक्त युवा अर नशा मुक्त भारत फगत एक औपचारिकता नी है बल्कि भारत रा नौजवानां रा स्वास्थ्य, खुशहाली अर सुनहरा सारू भेलो संकल्प है।

वणा नशा रे खिलाफ जाग जगावण अर नशा री लत ऊं जूझ रिया लोगां र मदद सारू आगे आवण वाळा लोगां री सराहवणा करता लोगां ऊं नशा मुक्त भारत सारू असरदार नारा तियार करण अर नौजवान संगीतकारां ऊं इण तरह रा गीत बणावण ने कह्यो जो नशा मुक्त जीवन रो संदेश देवे।

प्रधानमंत्री कयो के पीएम स्वनिधि योजना री मार्फत लाखों महिलावां ने नुवी ताकत मिल री है। वणा कयो के देशभर री कोई 35 लाख महिलावां ई योजना ऊं जुड़ने आपरा कारोबार ने आगे बधा री है।

श्री मोदी कयो के आज देश री बेटियां रा सपना री उड़ान धरती ऊं निकलने अंतरिक्ष ताई पूग री है। वणा मिशन शक्तिसैट रो जिकरो करता कयो के इण री मार्फत एक सौ आठ देशां री 12 हजार छात्रावां ने उपग्रह प्रौद्योगिक सीखण अर नवाचार रा हलका मांय आगे बधण रो मौको मिल रियो है।

प्रधानमंत्री हर घर तिरंगा अभियान मांय देशवासियां रे बढ़ चढ़ने हिस्सो लेवण माथे खुशी जतावता कयो के इण देशभक्ति री भावना ने और मजबूत करया है।

प्रधानमंत्री आवण वाळा तिवारां माथे **वोकल फॉर लोकल** रो मंत्र एक र फेरु याद दिरावता कयो के इण रो मतलब फगत ओ नी है, के देशवासी फगत माटी रा दिया खरीदे। वणा कयो के इण रे लारे मोटी अर गहरी निजर है। भारत ने आत्मनिर्भर बणावण रो मार्ग भारत मांय बण्या उत्पादां माथे मान करण ऊं ई बणेला।

प्रधानमंत्री रा 'मन की बात' कार्यक्रम ने सुणण सारु प्रदेश मांय ई बार ई लोगां मांय घणो उमाव निजर आयो। न्यारी-न्यारी ठौडां कार्यक्रम रा सीधा प्रसारण रा बन्दोवस्त करी ज्या। प्रदेश भाजपा कानी ऊं मुख्यालयां अर जिला थर माथे ई कार्यक्रम ने भेळा सुणी ज्या। मुख्यमंत्री भजनलाल शर्मा आपरा रेहवास माथे प्रदेशभर ऊं आई महिलावां रे साथे प्रधानमंत्री रा 'मन की बात' ने सुण्या।

ई दौरान मुख्यमंत्री कह्यो के कार्यक्रम ऊं देश रा लोगां रा जीवन मांय सकारात्मक बदलाव आयो है। वणा प्रधानमंत्री कानी ऊं कार्यक्रम मांय महिला सशक्तीकरण, नशा मुक्त युवा समेत न्यारा-न्यारा मुद्दां ने देश मांय बदलाव रा कारण बताया। मुख्यमंत्री कह्यो के सरकार प्रधानमंत्री रा सपना ने धरा माथे उतारण सारु वचनबद्ध है अर महिलावां रा सामाजिक अर माली विकास सारु बरोबर काम कर री है।

000

नीट पीजी 2026 परीक्षा आज जयपुर रो दो केन्द्रां माथे बिजली री गडबडी रे चालता नी व्हे सकी। नेशनल बोर्ड ऑफ एग्जामिनेशन इन मेडिकल साइंसेज असर वाळा उम्मीदवारां सारु 5 सितंबर ने दुबारा परीक्षा करावण रो ऐलाण करयो है। नुवा परीक्षा केन्द्र रा बारा मांय परीक्षार्थियां ने अलग ऊं जाणकारी दी जाएला। आं परीक्षार्थियां ने संशोधित प्रवेश पत्र ई काढ्या जाएला। नीट पीजी 2026 परीक्षा आज देशभर रा 11 सौ ऊं बत्ती केन्द्रां माथे व्ही, जटे 2 लाख 65 हजार ऊं बत्ती उम्मीदवार आ परीक्षा दी। नीट पी.जी. सारु राज्य रा 12 जिलां मांय 48 केन्द्र बणायी ज्या हा।

000

प्रदेश रा 309 नगरीय निकाय चुणाव सारु काले नामपाना भरण रो आखिरी दिन है। 1 सितम्बर ने नामपाना री जांच करी जाएला। उम्मीदवार 3 सितम्बर ताई आपरा नाम पाछा ले सकेला। इण रे पछे ई चुणाव मैदान री तस्वीर साफ व्हे सकेला। 4 सितम्बर ने चुनाव चिन्ह बांट्या जाएला। प्रदेशभर रा 10 हजार 245 वार्ड सारु अजेय ताई 13 हजार ऊं बत्ती नामपाना भर्या जा चुक्या है। ई बीचे भाजपा अर कांग्रेस ऊं टिकट री आस वाळा दावेदार जी जान ऊं आपरा पगस मांय समर्थन सारु जुट्या है। अजे ताई दोन्यू ई पार्टियां उम्मीदवार बणावण ने ले र तस्वीर साफ नी करी है। फेरु ई मान्यो जा रह्यो है के काले दोपहरा ऊं पैला राजनीतिक दलां कानी ऊं आपरा उम्मीदवार ने चुनाव चिन्ह दे दिया जाएला। ध्यान जोग है के आं नगरीय निकायां सारु दो दौर मांय वोट पड़ेला। पहले चरण रो वोट 9 सितम्बर ने व्हेला, वटे ई 11 सितम्बर ने दूजा चरण रा वोट पड़ेला। वोटों री गिणती 14 सितम्बर ने व्हेला। अध्यक्ष रो चुणाव 21 सितम्बर ने व्हेला।

000

राज्य मांय सौ फीसदी वोट देवण सारु जाग जगावण री स्वीप गतिविधियां रे तैत आं दिनां केई नवाचार कर्या जावे। रंगोली, मांडना अर होडां रे साथे ई न्यारा-न्यारा तरीका ऊं लोगां ने वोट रा कर्तव्य रे प्रति जागरुक कर्या जावे। बाड़मेर मांय कजली तीज ने ई मतदान ऊं जोड़तां सत्तू रा लड्डू री झांकी री मार्फत वोट रो संदेश दीरी ज्यो।

स्वीप गतिविधियां रे तैत आज केई ठौडां मतदाता जागरुकता दौड़ "रन फॉर यूनिटी" राखी ज्यी। श्रीगंगानगर मांय इंदिरा वाटिका ऊं सरु व्ही दौड़ खास मार्गां अर बाजारां ऊं व्हेती निकली। दौड़ री मार्फत मेरा पहला वोट-मेरी जिम्मेदारी रो संदेश दीरी ज्यो। प्रदेश मांय स्वतंत्र, निष्पक्ष अर साफगोई रे साथे चुणाव करावण सारु राज्य निर्वाचन आयोग बरोबर मॉनिटरिंग कर रियो है। निर्वाचन आयुक्त राजेश्वर सिंह दौसा मांय बन्दोवस्तां रो जायजो लियो। वणा कयो के मतदातावां री सुविधा सारु जरूरी इंतजाम करी ज्या है अर बिना डर रे सुचारु चुणाव पूरा करावण सारु खास सावचेती बरती जावे।

000

धौलपुर जिला रा आंगई हलका रा बिरजा गांव मांय आज संवारा पोखर मांय डूब जावण ऊं चार लोगां री मौत व्हे ग्यी। पुलिस बतायो के हादसा रा शिकार लोग हीरामन बाबा रा दर्शन सारु आया हा अर नहावण सारु पोखर मांय उतर्या हा। मरण वाळां मांय तीन महिलावां भेळी है। पुलिस गांव वाळां री मदद ऊं मरण वाळां रा शव निकालने पिरवारजनां ने सूप्या।

000

केन्द्रीय युवा मामला अर खेल मंत्री डॉ. मनसुख मांडविया आज नुवी दिल्ली मांय फिट इंडिया संडेज ऑन साइकिल रा 88वां संस्करण मांय हिस्सो लियो। ओ कार्यक्रम राष्ट्रीय खेल दिवस रे मौके ब्रिक्स री मदद ऊं जवाहरलाल नेहरू स्टेडियम मांय व्हीयो। डॉ. मांडविया कयो के साइकिल चलावणो सेहत रे साथे-साथे प्रदूषण अर ट्रैफिक री समस्या कम करण मांय ई मदद करे है। वणा नौजवानां ऊं रोज कम ऊं कम एक घंटा खेल अर शारीरिक कसरत ने देवण री अरज करी।

000